



Niuspepa bilong ol Papua Niugini stret

Wantok 12t

Momis Tokaut

Tupela Minista bilong gavman bilong Mista Michael Somare i pinis long wok minista. Em Pater John Momis, Minista i bosim ol samting aninit long graun na Mista John Kaputin, Minista i bosim ol Bikpela Skul. Dispela tupela Minista bai givim tok save bilong ol i go long Praim Minista long dispela wik tasol.

Pater Momis i tok i gat wanpela bikpela samting i kamap i mekim em i klia long dispela gavman. Em long dispela pasin Praim Minista i mekim taim em i wokim sampela ol senis insait long Kabinet. Em i no bin toktok gut wantaim ol minista bilong em pastaim.

Pater Momis i tok, Praim Minista i no bin toktok wantiam mipela bipo long em i mekim senis. I tru, Praim Minista i gat rait long mekim ol dispela senis. Tasol lo bilong olgeta demokretik gavman i olsem, ol lida i mas sindaun wantaim na paitim toktok pastaim. Orait bihain lida bilong ol i ken tok aut long wa-

nem senis i ken kamap.


Pater Momis i tok tu olsem wok bilong dipatmen i no pinis yet. I gat bikpela wok i stap yet long mekim. Tasol Praim Minista i no save long dispela. Em i soim olsem gavman i no save gut long wok bilong dispela dipatmen.

Long taim mi stap olsem wanpela minista long gavman mi gat pawa long mekim ol samting. Tasol i nogat we long yusim dispela pawa. I no mi tasol ol arapela minista i pilim olsem tu.

Planti taim mi bin toktok wantaim Praim Minista long wok bilong Dipatmen bilong ol Provins. Tasol

Mista Somare i tok wok bilong dispela dipatmen i laik pinis nau. Tasol em i no save long wok tru bilong dispela dipatmen.

Pater Momis i tok wanpela bikpela samting i kamap long taim ol i opim dispela dipatmen. Ol yangpela save man i go bek wok wantaim ol pipel long ol provins bilong ol. Bipo ol yangpela pipel i save ting long kam wok long Mosbi we Nesanel Gavman i stap. i go moa long pes 2



Poto hia i soim wanpela meri Indonesia i putim klos bilong ol tumbuna bilong em. Ol meri Indonesia i kamapim wanpela so long Boroko, Mosbi, long wik i go pinis. Dispela so ya ol i kolim basah. Ol Indonesia i wokim dispela so long makim de bilong ol mama. As tingting bilong so ya, em i bilong kamapim mani long givim Saut Pasifik Ats Festival.

Raus Long Haus

I gat someting olsem 1,000 man husat i stap long ol haus bilong Nesanel Hausing Komisn i no baim pe bilong haus. Ol dispela pipel i no bin baim longtaim yet i kam inap nau. Na ol i mas baim hariap. Na sapos ol i no baim bai Hausing Komisn i rausim ol long haus bilong ol.

Mista Paul Japhlom, Komisina bilong Nesanel Hausing Komisn i laik bai ol i mekim olsem. Long wanem, mani ol man

i no bin baim long pe bilong haus bilong ol i go winim tru K1.4 milien (wan poin 1 milien kina). Dispela dinau i kamap long 6-

pela mun i go pinis ya.

Mista Japhlom i tok, ol i tingting planti tru, long wanem

i go moa long pes 2.



Dilim
Kago
Long
Wewak
pes 11

Investment Corporation of Papua New Guinea

Smatpela man i save baim sea long Invesmen Koporesen Sapos yu laik save moa rait i kam long P. O. Box 155, Port Moresby.





YUMI GO WE?

Wanpela yangpela boi i laik marit. Em i stretim tok pinis wantaim papa mama na lain famili bilong em. Ol i orait na tupela marit.

Tupela i marit pinis na tupela i sindaun isi tasol. Tupela ya bihain meri i karim pikinini. Em i karim wanpela patpela strongpela pikinini man. Tripela wantaim i sindaun gut.

Tasol tupela yia bihain man ya i wok long ai gris nabaut. Em i lukim wanpela yangpela meri na em i bagarap. Em i kirap lusim meri-pikinini na bihainim dispela naispela meri.

Tasol dispela yangpela meri em lus meri stret. Oltaim em save spin na wok long gris wantaim ol boi. Man ya i gat bikpela sem tasol em i no inap lusim meri. Long wanem ol lain famili bilong meri ol i posin man stret. Na sapos man i lusim meri bai ol i kilim em i dai.

Stori hia em i wanpela tok piksa. Em i soim yumi we bilong laip hia long PNG. Yangpela man em makim PNG. Namba wan meri em 8-poin plen bilong Gavman bilong PNG. Pikinini i makim ol gutpela samting i kamap long dispela 8-pela plen.

Namba tu meri em mani, gris mani na dinau mani. Lain famili bilong meri em ol lain husat i givim grisman o dinau mani. Ol dispela lain ya i wok nau long bosim yumi na kantri bilong yumi.

PABLIK NOTIS

Mipela i gat planti pipel i aplai pinis long kisim Haus. Olsem na Nesanel Hausing Komisien i laik tok save olsem: Bai mipela i no inap isi long ol man husat i no save baim pe bilong haus long wan wan fohtnait. Mipela bai rausim ol dispela kain man long haus bilong ol na mipela givim i go long arapela man i wetim haus i stap. Ol man husat i ken baim pe bilong haus long wan wan fohtnait hariap. Dispela pasin mipela laik mekim i bihainim stret Lo bilong mipela.

P. JAPHLOM,
KOMISENA.

WANTOK NIUSPEPA

Nius i kamap 52 taim long yia nau.

Opis bilong Edita na Edvetaising long P.N. G.
P.O. Box 1982, Boroko
Telipon: 25.2500 Teleks: NE 22213


Edvetaising long Australia
Central Media Sales, Sydney
Telipon: 436.1000 Teleks: AA23211

PE BILONG WANPELA YIA, 52 NIUSPEPA

| Ples | Kam long balus | Long sip |
|---------------|----------------|------------|
| Mosbi | K 10.00 | K 10.00 |
| P.N.G. | K 14.00 | K 14.00 |
| Australia | A\$ 36.00 | A\$ 29.00 |
| N.Z., Fiji | | |
| Pasifik Ailan | NZ\$47.50 | NZ\$ 32.00 |
| USA, Yurop | US\$ 70.00 | US\$ 47.00 |
| | DM 120.00 | DM 81.00 |
| | L 31.00 | L 21.00 |

Momis Tokaut

i kam long pes 1



Pater Momis

Dispela tupela Minista ya i tingting nau long wok wantaim ol lida bilong oposisen. Ol i laik kirapim wanpela strongpela oposisen. Pater Momis i tok olgeta pipel bilong Not Solomon i yesa long em i ken lusim wok olsem minista insait long gavman bilong Mista Somare. Olgeta Memba bilong Not Solomons insait long Palamen i yesa wantaim. Na taim bilong vot insait long Palamen bai ol dispela lain i vot egens long gavman.

Pater Momis i tok bai em i go bek long provins bilong em. Provins bilong em, em wanpela ples we gavman bilong Mista Somare i no win long brukim tingting bilong ol pipel. Anna Rongap

Raus Long Haus

(i kam long pes 1)

planti man i wok long laikim haus. Na sapos olgeta man i baim pe bilong haus bilong ol, ol inap yusim dispela mani long wokim sampela nupela haus. Nau i gat 10,000 (ten tausen) pipel i salim ripot i kam pinis na i wetim haus i stap.

Ol sampela pipel i kisim haus pinis i no baim pe bilong haus i kam inap 6-pela nau. Mista Japhlom i tok, mobeta yumi rausim ol dispela lain na putim ol pipel husat i wetim haus i stap i go insait. Ating planti pipel i wetim haus i stap ol inap baim pe bilong haus sapos ol i kisim. Em i tok, sapos em i no mekim wanpela samting long ol dispela hambak nau, bai pasin nogut ya i no inap pinis.

Mista Japhlom i tok pinis long givim ol pipel 7-pela de tasol long baim. Sapos 7-pela de i pinis na ol

i no baim, Nesanel Hausing Komisien bai stretim tok wantaim kot na rausim ol dispela man. Hausing Komisien bai senisim ol lok long haus na givim i go long ol pipel i wetim haus i stap. Em i tok, ol dispela pipel i wok long bikhet nau, bai Hausing Komisien i no inap givim haus moa long ol inap 5-pela yia i

pinis pastaim.

Tasol Mista James Mileng, husat i sanap makim Pablik Sevis i tok, dispela kain pasin bilong Mista Japhlom i no stret. Bai sampela pipel i no gat ples bilong slip, sapos ol i rausim ol long haus bilong ol. Em i wari tru na i tok dispela notis bai givim ol 7-pela de tasol. Taim ya i sotpela tumas.

Julia Dala

Okuk Bekim

Lida bilong Oposisen Mista Iambaki Okuk i tok i mas i gat sampela samting i rong long wok bilong ranim gavman olsem na Mista John Kaputin na Pater John Momis i pinis.

Em i tok tu olsem em i no kirap nogut long harim olsem dispela tupela minista i laik pinis. Ol i bihainim tasol planti save man insait long kantri husat i wok long lusim gavman bilong Somare.

Mista Okuk i tok olsem nambawan samting Oposisen i laik mekim long dispela yia em long senisim lida bilong kantri. Em i tok "Mipela long Oposisen i gat inap save man na gutpela ol lida long wokim wok bilong gavman. Papua Niugini nau i no gat gutpela lida.

NIUS-NIUS-NIUS

☆ SOMARE GO LONG FIJI – NIUSILAN – Praim Minista, Mista Michael Somare bai go lukluk raun long Niu Silan na Fiji long kirap bilong dispela wik. Long nambawan wik baim em i lukluk raun long Niu Silan na toktok wantaim Praim Minista, Mista Robert Muldoon. Long Februeri 9, bai em i lusim Niu Silan na go lukluk raun long Fiji.

Misis Veronica Somare bai i go wantaim Praim Minista long dispela lukluk raun. Minista bilong Transpot, Mista Paias Wingti tu bai go wantaim ol. Wanpela F28 smok balus bilong Air Niugini bai bringim ol long dispela lukluk raun.

☆ KOPRA PUNDAUN – Prais bilong Kopra i pundaun pinis long PNG. Kopra Bod i teke-we pinis K9.00 long wanpela wanpela tan bilong ol kopra yumi kamapim hia long PNG.

Siaman bilong Kopra Bod, Mista Grose i gat planti trabel long wol olsem prais bilong kopra ia pundaun.

☆ BAIM TIMBA KAMPANI – Nesanel Gavman i tok aut pinis olsem em bai baim olgeta sea long Komonwelt Niugini Timba Kampani insait long Bulolo Morobe Provins. Sohbu Kampani bilong Japan i holim olgeta sea long dispela kampani. Nesanel gavman i laik kisim dispela kampani long wanem em i ting dispela kampani i wokim gutpela wok tru long bisnis bilong plang.

Kampani ya bai helpim tu ol arapela PNG kampani i wokim plang long mekim go het bisnis bilong ol.

☆ BIKPELA MANI LUS – Memba bilong Abau long Nesanel Palamen, Mista Gerega Pepenai tok Sentral Provinsal Fores Industri i lusim pinis bikpela mani bilong ol pipel.

Em i tok olsem bihain long taim wol bilong dispela kampani i pas pinis. Mista Pepenai i tok dispela kampani i no baim kompensesen mani i go long ol pipel bilong Abau. Kampani ya i bagarapim ol diwai kokonas na ol diwai long bus taim ol i wokim bisnis bilong ol.

Mista Pepenai i tok Sentral Provinsal Gavman i no inap kisim timba nau. Ol i no inap baim timba inap Provinsal Gavman i stretim kompensesen mani i go long ol pipel pastaim.

☆ SKUL TAKIS – Ol sumatin husat i go long Komyuniti, Vokesinal na Hai Skul long Is Niu Briten bai baim skul takis olsem:

Long Vokesinal skul ol namba wan yia sumatin bai baim skul long K50.00. Namba tu yia sumatin bai baim K30.00 na sumatin i wokim namba tri yia long Vokesinal skul bai baim K20.00 tasol.

Ol sumatin i go long ol Hai Skul bai baim takis long K35.00 i go inap long K140.00.

Is Niu Briten Provinsal Eksekutiv Kaunsil i oraitim dispela namba bilong skul takis.

Gred 1 i go inap long Gred 8 long komuniti skul bai takis long K2.00.

TAMBU TORO

OKA SALIM TORO I GO LONG BAIM BIA LONG BLAK MAKET.



TORO BAIM BIA NA KISIM IKAM BEK.



TAIM EM OPIY KATEM NA DRINIM BIA.



BLARI HEL YU TRIKIM MI NA PUTIM WARA LONG BOTOL BIA



Takis Nating Long K2.00

Long yia 1979, Gavman i mekim wanpela Lo olsem. Wanem pipel long PNG i laik flai i go i kam insait long PNG i mas bai K2.00 olsem takis bilong ples balus. O sapos ol pipel i laik go long Australia o wanem ovasis kantri bai ol i mas baim K5.00 long ples balus. Dispela K2.00 i kam aninit long mani ol pipel i lusim long baim wanpela tiket bilong balus.

Long las yia Gavman i kisim moa long 4 milien kina long ol pasindia husat i go long ovasis kantri. Gavman i i tingting long kamapim 1 milien kina olgeta long ol pipel i go i kam long balus long ol ples balus long PNG yet.

Sampela man i rait long Wantok Niuspepa na tok Air Niugini na Gavman i kisim bikpela mani long ol pipel. Tasol olgeta sevis long ples balus i bagarap nogut tru. Dispela takis mani i mas go insait long givim gutpela sevis long ol pipel long ples balus. Mipela long Wan-

tok i harim olsem na go aut long Jackson Ples balus na lukluk raun. Mipela kisim poto na lukim olsem, tok bilong ol i stret olgeta. Arapela ples balus olsem Goroka, Wewak, Hagen, Mote, na sampela moa i wankain tasol.

Long Jacksons ples balus long Mosbi, hamas handet man i sanap lek i tait olgeta. Ol i putim samting olsem 100 sia tasol na ol laki man meri i sindaun long en. Ol arapela man meri wantaim tupela tripela pikinini bilong ol i sanap wetim ol wantok bilong ol i kam o luk-

im pren bilong ol i go. I no gat sia bilong sindaun malolo na wetim wantok bilong ol.

Telipon. . . Sori wanem nupela man i kam long Mosbi bai painim hat tru long ringim wantok o painim trenspot long go long wanem hapem i laik i go.

Long ples balus yumi lukim wanpela longpela lain i stap autsait long wanpela rum telipon. Ol man meri i wet long ring. Long Jacksons olgeta telipon i bagarap na i gat tupela tasol i wok. Ol pipel i sanap longpela taim tru long ring. P & T na Air



Ples balus long Jackson, Mosbi. Ples i pas tru. Nogat ples long sindaun isi. Toylet na telipon tu i bagarap.

Niugini i no mekim wanpela samting long stretim telipon.

Toylet. . . Sapos ol turis i go insait long toylet ating bai ol 60 na kam autsait gen. I gat kain kain piksa na tok nogut ol pipel i rait long ol rum bilong toylet.

Bikpela rum . . .

Long Mosbi na planti ples balus long provins ol hap ples bilong wet long balus i liklik tru. Olsem na planti man meri i kam wantaim ol kago bilong ol i painim hat tru long karim kago bilong ol i go long putim long balus.

Ben Kasanda

Senisim Gems

PNG Spots Federesin i wanbel nau wantaim Praim Minista, Mista Somare na Gavman bilong PNG. Ol i no laik salim ol PNG tim i go long 1980 Olympic Gems long Moscow insait long Rusia.

Planti kantri olsem Amerika, Australia, Niu Silan i tok tu olsem ol bai traime pasim go het bilong dispela bikpela pilai.

Klostu olgeta bilong ol long dispela kantri long dispela bikpela pilai long olgraun i save salim tim geta 4-pela yia.

Rausim Blak Bratas

Foren Afeas dipatmen bilong PNG i tokim pinis "Blak Bratas", wanpela musik grup bilong Wes Irian, long lusim PNG. Ol Blak Bratas musik grup i kam long PNG long 1979. Ol i kam taim wanpela bisnis man bilong PNG, Mista Geno Vele i askim ol long kam helpim musik bilong PNG i go het.

Long dispela stap bilong ol long Mosbi, ol i bin salim 10,000 kaset singsing bilong ol insait long 2 mun tasol. Ol man i wok long baim yet. Narapela nupela singsing kaset ol i wokim taim ol i stap long Mosbi. Dispela kaset bai kamaut long mun Mas.

Ol lain ya i lusim Mosbi long Mande long wik i go pinis na ol i go olsem long Manila long kantri Filipin. Filipin em i wanpela kantri long Asia.

Menesa bilong Blak bratas, Mista Andy Ayamiseba, i tok ol i wari tru long kain pasin Gavman bilong PNG na Indonesia i wokim long ol. "Watpo yumi ol sitisen bilong Indonesia i raus na tupela Gavman i no givim mipe-la gutpela risen long rausim yumi", em i tok. Mista Ayamiseba i tok ol bai wokim wanpela ripot i go long Asosiesen bilong

ol artist long Indonesia na autim wari bilong ol.

Em i tok long las yia, Minista husat i bosim Foren Afeas dipatmem, Mista Ebia Olewale i tok orait long ol long stap long wanpela yia olgeta. Foren Afeas opis i tok Mista Olewale i no tok orait long dispela.

Wanpela tokman bilong Foren Afeas long Mosbi i tok Gavman i no rausim ol. Tokman i tok pastaime ol i kam insait long PNG gavman i givim ol hamas taim bilong stap long PNG. Tasol nau ol i abrusim dispela taim na Gavman i tok taim bilong ol i pinis na ol i mas go.

Tokman i tok taim ol lain ya i stap long Mosbi gavman i givim ol wankain rispek olsem ol narapela man bilong arapela kantri i stap long PNG nau.

Ben Kasanda



Larim Wantok Stap Long Ples

Dia Edita — Yu inap givim mi liklik spes na bai mi autim wari bilong mi i go long ol wantok bilong mi. Wari bilong mi i go oslem.

Yes, ol wantok Simbu i wok i stap long Mosbi. Yupela i save wok na baim balus bilong ol wantok i stap long ples long kam long Mosbi. Em i kam long Mosbi painim wok no gat nau na stap pasindia long Mosbi. Em i nogut tru.

Olgeta hap i gat wan wan man bilong ol arapela ples tasol ol Simbu i pulap tru long olgeta hap. I gat ol yangpela man meri, lapun man meri na ol

pikinini tu.

Sapos yu wok, yu mas kisim mani i go long ples na lukim ol wantok. Yu no ken odaim ol wantok long kam daun long Mosbi. Em i tru olsem yu odaim ol long kam daun na i no ol yet kam long laik bilong ol. Em i kam wantaim meri bilong em na painim wok no gat nau na em i salim skin bilong meri bilong em. Em i nogut tru. Na man yet i save go stil na raskol nambaut. Em i no gutpela pasin.

Olsem na taim ol arapela man i mekim wanpela rong ol man i save tok, ol Simbu tasol i wokim. Tok

olsem i nogut. Yumi ol gutpela man tasol nem bilong yumi i bagarap pinis. Yupela mas lukim na no ken baim balus moa long ol wantok long kam daun long Mosbi.

Sapos yu bel hat long hap tok bilong mi orait, rait tasol i kam long Wantok na bai mi ken lukim.

Poka Kumba.
Goglime Viles, Simbu.

Meri Wokim Rabis Pasin

Dia Edita — Inap yu givim liklik spes long mi na bai mi lusim liklik wari bilong mi. Wari bilong mi i go olsem.

Long namba 12

de bilong mun Desemba, brata Joseph Klesi, em i raitim pas i go long Redio Is Sepik na em i tok olsem, taim em i bin go raun long Wewak taun em i bin bungim ol yangpela meri na em i bin tok gut moning o gut de long ol. Ol yangpela meri ya i lap na tok, husat i save long yu. Ol i tok olsem long brata Klesi Na tarangu ya i sem nogut tru.

Tru tumas brata, i no yu tasol ol i save tok olsem. Nogat. Ol i bin tok olsem long mi tu olsem na mi laik sapatim yu long toktok bilong yu.

Yes Klesi, dispela kain ol meri i save toktok wantaim ol

boipren bilong ol tasol. Mi ting ol i no save toktok wantaim papa mama na ol brata bilong ol na ol arapela wantok tu. Nogat tru. Tasol taim em i go long lukim boi pren bilong em, em i save laik long go holim pas han bilong boi ya na kis long pes o bodi bilong em. Em i save les tru long toktok wantaim boi ya.

Em tasol wari bilong mi. Sapos yu husat man o meri i bel hevi long mi, plis rait tasol i kam long Wantok Niuspepa na bai mi ken lukim.

Ruben Tangu,
Kapainmari, Is Sepik
Provins

Mi No Kaunim Saveman

Dia Edita — Mi laik autim liklik wari bilong mi i go long Wantok Niuspepa. Wari bilong mi i go olsem.

Ol save man na ol man i gat gutpela wok, ol save tok baksait long ol man i wok lepa long ol kampani insait long PNG. I tru ol save man toktok baksait tasol ol i no save na tok. Ol i tok nating

tasol. Saveman na man wok insait long ol kampani, mipela save wok mani wantaim. Na ol saveman i kisim bikipela mani moa tasol ol i no inap winim lepa man. Tupela i sem tasol.

Sori, ating yu save nating tasol na tok bilas long lepa wokman bilong ol kampani. Yu no gat

tru. Na yu save lukim ol lepa wokman tu. Ol save baim smuk, dring na kaikai tu. Na tu ol man bilong ples na ol lepa wokman i save wokim planti wok bisnis long PNG.

Ol saveman i kisim bikipela mani tasol ol lepa man i no inap lukim liklik wan toea bilong ol. Sapos yu ritim dispela tok yupela i no ken tok baksait moa.

Na husat i kros o husat i laik rait moa long dispela tok bilong mi orait, rait tasol i go long Wantok Niuspepa.

Londe Liandae.
Wabag, Enga Provins.

Salim ol pas
i kam long:
WANTOK
BOX 1982
BOROKO

Husat man bilong kisim poto i lukim dispela pas na i laik engensim mi, orait rait tasol i kam long Wantok Niuspepa,

S. Zemey.
Nipa, S.H.P.

Kisim Gut Poto Long Mak

Dia Edita — Mi laik autim wanpela wari i no save stret long ai bilong mi wantaim ol arapela man meri bilong kantri.

Taim ol potografa o ol man bilong kisim poto, i laik kisim poto bilong ol man meri

i pilai, ol i mas lukluk gut pastaim na kisim poto.

Mi tok olsem bilong wanem taim meri i ran o kalap sotpela sket bilong em i flai klia. Na tu taim man i save pilai ragbi na arapela man i save pulim trasis bilong em i kam daun na as bilong em i save stap nating. Ol man bilong kisim poto i save kisim na putim long pepa na olgeta man i save lukim. Em i no stret.

Yumi olgeta i gat as tasol em i samting

sem na yumi save karapim. Man i gat trasis na i save orait, tasol meri i no gat tru. Sket bilong em i save flai na liklik trasis bilong em i save pas karangi i stap. Olsem na ol man bilong kisim poto bilong ol pepa olsem Pos Kuria na Wantok na Niu Nesen i mas no ken kisim ol dispela kain poto. Ol i mas kisim gutpela poto.

No ken ting mi lukim as bilong ol meri na mi wari olsem na mi toktok. Tasol em i samting i no

stret long tingting na long ai bilong mi.

Em i no gat rong long meri i kalap nambaut long taim bilong pilai. Tasol em i rong long poto man husat i lukim sket i flai na semtaim em i sambai pinis long presim baten long kemera bilong em.



OL PAS



MIPELA SAVE MEKIM OLKAIN

WOK BILONG BENG

☆ Pas Buk

☆ Sek Buk

☆ Man i ken putim mani long beng na winim profit mani

☆ Sapos yu kisim narakain mani bilong wanpela arapela kantri, beng i ken senisim i kamap kina na toea.

☆ Ben i ken stretim olgeta tiket bilong yu, sapos yu laik go lukluk raun long arapela kantri.

**Bank of
New South Wales
(PNG) Ltd.**

Mipela amamas tru long helpim yu

Les Long Wankain Piksa

Dia Edita — Inap yu givim liklik spes long mi na mi laik autim liklik wari bilong mi. Yes, wari bilong mi i go olsem:

Olgeta taim mi save baim Wantok Niuspepa na mi save lukim wanpela samting i no stret liklik long ai bilong mi. Olsem na mi laik autim i go long Wantok. Em long piksa bilong ol man meri ol i save holim ol botol fanta na botol coke na ol save tok, yumi amamas long coke o fanta.

Olsem na long tingting bilong mi, mi save lukim wan kain piksa tasol i save kamap long Wantok Niuspepa na mi save les liklik long ol dispela piksa.

Olsem na plis in-

ap yupela senisim ol lusim ol dispela piksa o no gat? Long wanem olgeta taim dispela piksa tasol i save kamap long Wantok na tu mipela i save lusim mani bilong mipela long baim Wantok na mipela save lukim wanpela piksa tasol.

Inap long yupela ol man bilong raitim Wantok senisim na putim kamap ol nupela samting. Em bai gutpela tru.

Em tasol liklik wari bilong mi. Sapos husat brata o susa i laik sapatim mi orait, rait tasol i go long Wantok Niuspepa na mi ken lukim.

Tenkyu tru.

Yunu Siwi,
Maun Hagen, W.H.P.

No Ken Tok Bilas

Dia Edita — Inap yu putim liklik wari bilong mi long Wantok Niuspepa. Wari bilong mi i go olsem.

Mi save ritim planti pas long Wantok Niuspepa i kam long ol kain kain manmeri insait long PNG. Ol i save raitim kamap planti tok nogut na tok bilas long arapela manmeri long PNG. Ol i save mekim planti tok nogut na tok bilas tru na long tingting bilong mi, dispela i no stret.

Long tingting bilong mi, mi ting ol-

sem yumi no ken tok nogutim o tok bilasim ol manmeri i mekim dispela kain pasin long yu. Yumi mas no ken belhat long husat i mekim dispela kain pasin long yumi.

Sapos yumi i mekim olsem, bai yumi i stap wan bel.

Na yu husat brata o susa i no laikim tingting bilong mi, orait, rait tasol i go long Wantok Niuspepa na bai mi amamas tasol long lukim.

Hubert Suke,
Madang, Provins.

Praim Minista Win

Tupuola Efi, Praim Minista bilong Westen Samoa, nau i sindaun gut long wok bilong em bihain long ol i traim rausim em olsem Praim Minista. Inap long wanpela yia olgeta ol pipel bilong Westen Samoa na ol arapela kantri i wok long lukluk long ol pait politik insait long dispela kantri.

Long mun Februeri 1979, bihain tasol long bikpela ileksen, ol memba i tingting long rausim Tupuola olsem Praim Minista na putim wanpela arapela man long ples bilong em. I gat 47 memba insait long Palamen bilong Westen Samoa.

Long dispela kantri, i no gat ol politik pati. Olgeta memba bilong Palamen bilong ol i stap independen. Na long taim bilong ileksen, ol matai (em ol man i go pas long famili) tasol i ken vot. Long dispela kantri i gat 151,000 (wan handet fifti wan tausen) tasol bilong ol tasol i matai.

Taim ol i vot long makim nupela Praim

Minista, Tupuola i bin win long wanpela vot tasol.

Bihain long em i win, Palamen i bin malolo inap 9-pela mun. Ol niuspepa na redio i wok long pairapim toktok long dispela vot.

Ol dispela memba husat i laik rausim Tupuola i kamapim wanpela pati bilong ol. Nem bilong en

Yunaitet Humen Rait. Dispela pati i pairap strong tru taim wanpela kot i painim olsem 3-pela sapota bilong Tupuola i bin grisim ol pipel long mani long taim bilong ileksen. Olsem Gavman wokim nupela ileksen long makim ol nupela man bilong dispela tripela sia. Tasol ol oposisen i les long wet na ol i singaut long man i holim wok long pinisim gavman



NIUS

na bai ol i holim nupela ileksen.

Tasol Tupuola i strong long ol i mas wet inap nupela ileksen bilong ol dispela tripela sia i pinis. Taim ileksen ya i bin kamap ol lain bilong Tupuola i winim ol dispela sia. Na ol lain bilong oposisen i bruk na i go nambaut.

Tupuola i bin stat wok politik long yia 1962 taim Westen Samoa i bin kisim independens long Niu Silan. Na long 1976 em i kamap Praim Minista. Tupuola i bin mekim planti senis

Saut Pasifik: Samoa

0 800 mls Equator

Solomon Is.
Papua New Guinea
New Hebrides
New Caledonia
Australia
Sydney
Tasmania
Fiji Is.
Apia
Savai
Upolu
Pago Pago
Manua Is.
Tutuila

452 M.A.

0 50 mls

TUPUOLA EFI
Prime Minister of Western Samoa

SAMOAN ARCHIPELAGO

| Western Samoa | American Samoa |
|---------------|----------------|
| Apia | |
| Savai | |
| Upolu | |
| | Pago Pago |
| | Manua Is. |
| | Tutuila |

insait long kantri bilong em taim em i kamap Praim Minista. Westen Samoa i bin kamap memba bilong ol planti bikpela kibung. Ol i kamap memba bilong Yunaitet Nesens, Saut Pasifik

Komisen na planti arapela bikpela kibung. Insait long Westen Samoa planti bilong ol pipel i stap insait long ol ples longwe long taun. Wanpela bikpela samting Tu-

puola i traim long mekim, em long helpim sindaun bilong ol dispela pipel. Em yet i tok, ol pipel yet i givim pawa long mi, olsem mi bosim Samoa. Anna Rongap

Presiden i go pas long wok



Presiden i go pas long ol pipel long wok long rais fam. Em tasol i kirapim ol pipel long wok.

Long taim bilong tumbuna, ol pipel bilong PNG i save planim kaikai bilong ol yet. Tasol nau, taim i senis pinis. Olgeta yia gavman i save lusim planti mani long baim kaikai i kam long ol arapela kantri.

Las yia gavman i bin putim mak long hamas rais wan wan provins i ken kisim. Long wanem gavman i laik lukim ol pipel i planim kaikai bilong ol yet.

Long Sri Lanka tu gavman i wok long askim ol pipel long planim kaikai bilong ol yet.

Rais em i namba wan kaikai bilong ol pipel long dispela kantri. Sri Lanka i no save baim rais inap long 200 yia nau. Em yet i save kamapim inap rais long ol pipel bilong em. Na tu, ol arapela kantri insait long Asia i save baim rais long en.

Long taim gavman bilong Ingran i bin kamap long dispela kantri long 1815, ol pipel i wok long planim rais yet. Tasol liklik taim bihain ol pipel i stat long les nambaut na i no planim planti rais. Na rais i sot long kantri bilong ol na ol i stat long baim rais long ol arapela kantri.

Long 1948, taim Sri Lanka i kisim independens, gavman i traim gen long mekim ol pipel i planim rais.

Tude ol fama i save lukim Presiden Jayewardene i go pas long planim rais. Na ol i tok bai ol i traim long mekim olsem. Gavman i save helpim ol man long pikinini rais na gris bilong graun. Anna Rongap

SUMITOMO



Askim mipela long strongpela taia tru

Landcruiser, Dyna na Stout Taia

SL 803

DUNLOP
Aircorps Rd, Lae
42-1322

Kurumul Ti

DISPELA KURUMUL TI I GO PAS TRU LONG OLGETA ARAPELA TI LONG PAPUA NIUGINI. EM I WINIM OLGETA ARAPELA TI LONG PAPUA NIUGINI.

YU INAP PAINIM KURUMUL TI ISI TRU LONG OLGETA SUPAMAKET NA TRET STUA.

Ol Sios Krosim Gavman

Apartheid Polisis, em i wanpela lo i tok olsem ol kain kain pipel i mas stap bilong ol yet. Na i mas mekim ol samting namel long ol yet. Ol i no ken go raun wantaim ol pipel i gat narakain skin. Dispela kain lo i stap long Saut Afrika tasol. I no gat long arapela hap long dispela graun i gat lo olsem, nogat tru.

Ol sios lida i bung nau long senisim planti ol dispela lo. Na ol sios i tok, sapos wanpela lo i no bihainim stret pasin bilong lotu bilong ol, ol pipel no ken bihainim dispela lo. Ol i mas holim strong pasin bilong lotu bilong ol. Ol bai tingim tasol lotu bilong ol na no ken wari long wanem samting gavman i mekim long ol sapos ol i sakim tok bilong gavman.

Em olsem long 1979, Enkliden Sios i tok long wokim ol skul bilong ol yet. Na long ol dispela skul bai i gat ol pikinini bilong ol waitman na

bilong ol blak man tu. Ol bai go skul wantaim. Ol i tok bai ol i no inap harim tok bilong gavman sapos gavman i krosim ol. Long Janueri long dispela yia, hetman bilong Enkliden sios i tok, sapos i no gat ol gutpela we bilong senisim dispela pasin na bungim ol pipel wantaim, bai planti kristen i kilim ol arapela pipel na planti tu bai i dai. Em sapos ol bikipela trabel i kamap.

Na Methodist Sios i no laikim kain nem gavman i givim long ol lain pipel i wok long mekim pait long gavman. Gavman i kolim ol dispela paitman

“teroris.” Dispela sios i wok long tok strong tu long gavman i mas autim wanpela lida bilong ol, Nelson Mandela long kalabus.

Planti bilong ol pipel i stap long Saut Afrika, em ol i blak man meri. Em ol pipel bilong as ples yet. I gat liklik namba wait man tasol. Ol wait man ya i wok long bosim kantri. Long kantri, olgeta samting i gat mak long en. I gat hap ol i makim bilong ol blak man na i gat hap ol i makim bilong ol wait man tasol.

Long taun, i gat tupela hap. Wanpela

LOTU NIUS



hap i bilong ol blak man long slip na raun. Na arapela hap i bilong ol wait man tasol. Dispela lo bilong gavman i tok, ol blak man i no ken raun long hap bilong ol wait man. I gat wan-save sindaun malolo. Ol i makim “Wait Tasol”. Na i tambu tru long husat blak man long go raun long dispela hap. Sapos wanpela blak man i go long dispela hap bai ol i kalabusim em hariap tru. Tasol ol wait man i ken raun long wanem hap long laik bilong ol tasol. Ol i ken go raun long hap bilong ol blak man i no ken go long



Poto i soim wanpela taun bilong ol blakman tasol. Long dispela sampela samting tasol ol sios i kros wantaim Gavman.

hap bilong ol wait man.

Dispela kain kros pasin ol sios lida i wok long mekim long gavman i stat longtaim yet. Insait long yia 1950 na 1960 gavman i bin rausim planti sios lida husat i tok egensim gavman na dispela Apartheid Lo bilong en.

● Anna Rongap


Insait long wol tude, i gat 70 milien pipel bilong Luteran Sios. Long dispela namba, PNG i gat 612,000 (siks handet na twelv tausen) pipel bilong dispela sios. Ol dispela namba ya mipela i kisim long wanpela wok painimaut Luteran Wol Fderesen Infomesen Biuro i bin mekim i no longtaim i go pinis.

Dispela wok painimaut i soim olsem i gat 46 Luteran Sios insait long rijen bilong Asia na Pasifik.

Long PNG yet i gat tripela Luteran Sios. Namba wan em i Ivenjelikal Luteran Sios bilong PNG. Em i gat 550,000 (faiv handet na fifti tausen) man meri. Na namba tu em i Gutnius Luteran Sios bilong PNG. Em i gat 55,000 (fifti faiv tausen) man meri. Namba tri em i Siassi Luteran Sios. I gat 7,000 (seven tausen) pipel i save go long dispela lotu.

NUPELA KAIN NAMBAWAN

BOKIS AIS



Dispela bokis ais em i nambawan tru! Yu yet inap wokim wankain long piksa. Insait long wan aua yu yet inap mekim wanpela bokis ais.

Em i gutpela moamoa yet long lukautim kaikai bilong gaten taim yu wet long i go long maket. Sapos yu i gat wanpela tret stua, dispela bokis ais bai lukautim gut ol loli wara, mit, kaukau na kaikai yu save salim. Yu kam lukim ol saveman long STEAMSHIPS REFRIGERATION — na bai ol i tok tok wantaim yu long dispela kain bokis ais.



REFRIGERATION
AND
AIRCONDITIONING
DIVISION



Nem bilong ol: Lauri Mills na George Grigorieff
O sapos yu i gat planti wok ringim ol long dispela 3-pela namba: 22 0316
22 0326 na 21 1164.

HEBAMO 128

Mipela

Wetim

T.V.

Ben Kasanda



Bai Titamini

Nem bilong mi, insait long Ambunti Sab Distrik. Bai Titamini na mi bilong ples Purkunawi

PROVINS NIUS



“Mi no save long dispela nupela samting i laik kamap. Mi man bilong bus ya. Mi kam tasol long taun na bai mi go bek gen long ples. Olsem na sapos samting i kam tru orait bihain mi lukim na save long en orait mi inap toktok long dispela samting.”

DIPATMEN BILONG BOSIM OL PROVINS

KOMITI BILONG GLASIM OL GAVMAN BILONG PLES

(Dispela komiti i stap insait long Dipatmen bilong bosim ol Provins na i gat wok long lukluk na givim nupela tingting i go long ol Gavman bilong ples.)

Klostu bai dispela komiti i go raun long planti provins bilong holim ol pablik miting. Long ol miting ya, bai ol pipel husat i laik givim aidia bilong ol, i ken. Em ol aidia bilong Lokal Gavman Kaunsil na Komyuniti Gavman na ol Viles Developmen Asosiesen na kain samting olsem.

Mipela bai givim tok save long ol ples na taim bilong miting bai yu ken lukim long ol niuspepa o harim long ol redio.

Sapos yu laik autim tingting bilong yu long pepa, yu ken raitim na salim i kam long:

Executive Officer,
Committee of Review into Local Level
Government,
P.O. Box 1287,
BOROKO.

Yu ken ring long 271874 na askim long BERNARD NARAKOBI, husat i Siaman bilong dispela komiti.

Praim Minista, Mista Michael Somare i tok, televisen ya bai i bilong givim save long ol pipel na kamapim go het bilong PNG. Em i tok tu olsem, yumi mas was gut bai televisen i mekim wok bilong yumi. Na i no gut long yumiwestim taim na mani nating long em. Na bai em i no inap mekim gutpela wok long PNG. Olsem na sampela pipel long PNG i no hepi long televisen i kam long yumi.

Sampela pipel i ting, televisen bai helpim ol pipel i stap tasol long taun. Na planti pipel i stap long ol ples bilong ol, bai i no inap lukim. Na tu planti samting i kamap long televisen bai i no gutpela tumas. Ol dispela kain samting bai bagarapim tingting bilong ol man meri. Olsem na bai tingting bilong Gavman long yusim long mekim ol gutpela wok bai popai. Na tu, sampela pipel husat i no hepi long aidia bilong Gavman i tok, ol bikpela kampani bai mekim bikpela mani moa. Em long taim ol i salim televisen long pipel bilong PNG.

Dipatment bilong Praim Minista bai lukautim wok bilong kamapim televisen. Dispela wok bai i hat moa. Olsem na bai longtaim liklik pastaim bipo televisen i kam. Mista Somare i tok, em i ting dispela bai i gutpela we tru bilong kirapim PNG long laik bilong ol pipel yet.

Em i tok tu olsem, televisen bai no inap kamap yet. Dipatmen bilong em bai lukluk long ol kain program bai kamap long televisen.

Nem bilong mi: Paul Kav. Na mi bilong ples Wom long Wewak. Mi wok olsem wanpela mekanik long Wewak. “Mi ting televisen bai givim draipela helpim long givim save long ol pipel, skul manki, wokman meri, lain bilong ples na planti moa.

meri bai tanim na sindaun olsem ol waitman i sindaun nau. Olsem yumi lusim tingting olgeta long wok na was tasol long Televisen i stap de na nait.”



Paul Kav

Tasol mi ting tu olsem sindaun bilong yumi long ples na ol taun bai bagarap liklik. Ol manki long taun bai lukim ol kain samting olsem Kung-Fu piksa long Televisen na bihain bai ol i kirap na bihainim em. Sapos Televisen i kam ating bai yumi ol PNG man na

Nem bilong mi: Anita Gaura, mi bilong Kunjingini insait long Maprik.

“Mi amamas long Gavman long bringim dispela nupela samting i kam insait long PNG. Pes taim mi lukim pait bilong Tony Aba na Martin Beni

insait long wankain samting olsem Televisen tasol dispela samting em i kamap long kaset. Ol i potoim pait bilong tupela na wokim olsem kaset na ol i putim long video na mi lukim. Mi amamas long lukim dispela. Mi ting em

bai isi long yumi nau long lukim wanem samting i kamap long arapela kantri long wanem pastaim yumi save ritim long niuspepa na harim ol nius long redio na yumi no klia tumas long ol stori. Televisen ating bai givim mipela bikpela save tru.”



Anita Gaura

Namba 23 de bilong mun Janueri i wanpela bikpela de long wanem insait long nambawan kabinet miting bilong dispela yia long Wewak, ol Minista i tok orait long bringim Televisen i kam insait long PNG.

Televisen i wanpela samting olsem bokis we pipel inap long lukim ol samting i kamap long PNG, Australia, Amerika, Rasia o Ingran.

Long dispela taim yet tupela Wantok ripota i raun long Wewak na i askim sampela pipel long rot long tingting bilong ol long dispela nupela samting ol i kolim televisen. Hia em bekim bilong ol.




Veronica Samen

Nem bilong mi: Veronica Samen na mi bilong ples Karasau long Kairiru Ailan. Pastaim mi wanpela nes. Tasol nau mi marit na mi stap nating.

“Mi no klia tumas long dispela samting yupela kolim long Televisen. Ol pipel i raun i go long arapela kantri na lukim dispela samting i save long en. Tasol yumi bilong ples kanaka na yumi no klia yet. Taim em kam orait yumi bai save long en.

Tasol mi ting dispela samting ating bai gutpela long yumi na i gutpela tru Gavman bilong yumi i oraitim.”



Ol man sindaun lukim T.V.

**Air Niugini
helpim go het
bilong
Kantri**



**FAST
COMMUNICATION**

AIR NIUGINI 

Ol Rural Helt Nes

Klostu olgeta Gavman skul bilong trenim ol nes, i trenim ol long wok insait long ol taun. Helt Dipatmen i ting olsem: klostu olgeta bikpela haus sik i stap long taun. Na em i wok bilong mipela bilong trenim ol nes bilong dispela kain haus sik. Hia yu ken painim bikpela wok helt na planti sikman.

Em i orait. Tasol husat i save ting long ol pipel i stap long ples? Olsem wanem? Ol liklik hap pipel tasol i stap long ol taun, ol tasol i mas gat gutpela nes? Na olsem wanem, ol pipel i mas ran tasol i go long taun, sapos ol i gat bikpela sik?

Planti misin na sios i wari long dispela. Olsem na ol i wok long trenim ol nes long wok long ples. Dispela wok yumi save kolim rural helt wok. Na kain nes i tren olsem, yumi kolim rural Komyuniti nes.

Long Lemakot long Nu Ailan, Kato-

lik Sios i ranim wanpela helt senta. Na wantaim, em i ranim wanpela skul bilong trenim ol nes. Ol i gat 32 studen, na kos bilong ol i ran inap 3-pela yia. Ol dispela nes i winim fom 4 pinis. Ol i mas kisim gutpela mak long maths na Inglis, sapos ol i laik aplai long kamap nes.

Pasin bilong ol Lemakot nes, ol i save sindaun long klasrum tripela wik stret long wan wan mun. . . Ol i stadi long helt edukesen, na lukautim ol mama na pikinini, skul helt, pasin bilong givim ol kain sut, pasin bilong helpim mama i karim pikinini,

na pasin bilong helpim dokta i katim bodi bilong sikman.

Orait, inap 18 de stret ol i save skul olsem. Nau inap 7-pela de gen ol Lemakot nes i save go aut nambaut long 41 viles na wok bus. Wan wan grup i gat 4-pela nes na ol i raun long tupela hapsait bilong Nu Ailan na mekim wok helt na wok nes. Ol i save slip long ol viles long dispela taim.

Na sampela nes bilong Australia ol MSC Sista i ranim dispela haus sik na skul nes.

Hetmistres tru bilong skul em Sista



Lynne Andrew bilong Australia.

Ol sampela lain nes sanap klostu long haus sik long Lamakot.

Meri idai pinis

Ol Sios i save ranim planti skul nes long PNG. Na ol i save mekim gutpela wok tru. Insait long ol dispela skul i gat narakain tingting tu. Yu lukim: long yia i go pinis, olgeta nes long ol bikpela haus sik bilong Gavman i straik, i stap wok. . . . Tasol i no gat sampela nes i save wok long ol haus sik na klinik n helt senta bilong ol Sios o misin i bin straik.



Kari Pis Long Gris Bilong Kokonas. . .

Ol Samting Yu Mas i Gat.

1. Tupela kap mit bilong pis
2. Tupela tebol spun bata o majarin
3. Wanpela kap gris bilong kokonas
4. Tupela anian
5. Tupela potato
6. Tripela tabolspun kari
7. Sol na Pepa.

Ol we bilong kukim.

Katim anian na praim liklik taim tasol long bata. Bihain putim potato, sol, pepa na kari. Orait kukim liklik taim moa. Katim pis i go liklik na putim i go wantaim ol dispela samting. Kapsaitim gris bilong kokonas i go na larim em i kuk isi isi inap long 20 minit. Em i gutpela sapos yu kaikai wantaim rais.

Nu Ailan Provins.

Mis Tito i bin go long Manila long stap insait long wanpela kos bilong skulim ol wok man bilong Pos Ofis. Taim ol i laik go lukluk raun long wanpela taun insait

long Filipin ka ol i ron i go long en i bin bamp wantaim wanpela arapela bas na paia i kirap. Mis Tito wantaim 11-pela arapela pipel i bin dai insait long dispela bagarap.



Teresia i luk hepi. Tasol yu lukim: em i no gat han na i no gat fut olgeta. Em i gat sik lepra. Tasol em i stap long haus sik long Yampu long Enga, na ol i bin pinisim sik bilong em. Tasol sori, ol i no inap givim bek han lek bilong em. Tasol Teresia i no wari. Em i hepi; em i belgut.



FANTA

it's a BOTTLE OF FUN

FANTA IS A REGISTERED TRADE MARK OF THE COCA-COLA COMPANY



PREN BJLONG YU INAP OLTAIM



Nek Bilong Chauka

Nek bilong "Chauka" em i nem bilong Redio Manus na em i gutpela nem tru na i pas stret long Manus Ailan. Em i long Wanem, "Chauka" em i wampela pisin i stap long Manus tasol. Yu no ken painim long arapela hap bilong PNG.

"Chauka" em i braunpela pisin na sais bilong em i wanmak olsem bikpela koki. Na gras bilong em i wan-kain liklik long koki. "Chauka" i save bikmaus moa. Tulait i laik kamap, orait, em i tok save long yu. Em i bikmaus na yu kalap nogut long bet.

Chauka i save raun wantaim meri bilong em. Chauka man i singaut, orait, oltaim Chauka meri i mas bekim tok sampela pipel i ting Chauka i save skrapim tok ples bilong ol. Taim Chauka i kalap kalap nabaut long ol han bilong kokonas na i painim kaikai, em i save toktok isi, na i olsem tupela meri i wok long gaden na i skrapim tok.

Sampela tumbuna i tok, Chauka em i kamap long Saut Manus, long hap bilong ol Titon Pipel. Long Dispela hap

planti pipel yet i gat nem Chauka.

Jon Isinii, Dairekta bilong Redio Manus, i bin painim sampela stori bilong Chauka. Ol pipel bilong Baluan Ailan ol i stori olsem.

Bipo tru Chauka em i nem bilong wampela man. Na nem bilong Pisin em i Pinginiu. Orait, wampela de, man Chauka i go long gaden wantaim meri bilong em. Tupela i pilai na pisin Pinginiu i lukim. Nau em i stat long bikmaus long pasin bilong em.

Orait, nau man ya i sem na i kros nogut. Em i tokim pisin em i mas kisim nem Chauka nau. Na em i mas bungim ol samting bilong em na klia long Ailan Baluan.

Orait, nau Pisin i holim kanda na sak-

sak na taro na wara na i kirap i flai long bik Manus. Taim em i flai, kain kain samting i pundaun long han bilong em. Olsem na Tude yet yu ken painim saksak na taro na kanda long Ailan Baluan na Ailan Lou.

Long dispela taim Chauka i bin promis em i no ken lusim bikples Manus moa na flai i go long ol Ailan nabaut. Na tru tumas, inap long tude em i mekim olsem. Chauka i hevi liklik na wing bilong em i no strong. Em i no inap flai wan kilometa olgeta.

Maski long wing bilong Chauka bun bilong em tasol i stap long maus bilong em. Olsem, ating, em i gutpela nem tru bilong Redio Stesin Manus. Toktok bilong em i mas bihainim kraik bilong Chauka. Em i mas go longwe moa. ● Frank Mihalic

Nupela Holide

Praim Minista Michael Somare, tude i tok, Nesenel Eksekutiv Kaunsil i yesa pinis long de malolo bilong ol 16 provins. Na ol pipel insait long wan wan provins ya bai kisim malolo stret long bikpela de bilong provins yet. Dispela malolo, em i bilong makim na tingim bek gen long de ol dispela provins i bin kisim provinsal gavman.

| | |
|------------------------|-------------|
| Simbu Provins | 22 Februari |
| Nu Ailan Provins | 22 Februari |
| Morobe Provins | 7 Epril |
| Noten Provins | 18 Epril |
| Madang Provins | 9 Jun |
| Milne Be Provins | 7 Julai |
| Sauten Hailans Provins | 18 Ogas |
| Manus Provins | 25 Ogas |
| Bougainville Provins | 1 Septemba |

| | |
|-----------------------------|-------------|
| Wes Nu Briten Provins | 17 Septemba |
| Westen Provins | 19 Septemba |
| Enga Provins | 3 Oktoba |
| Westen Hailans Provins | 27 Oktoba |
| Isten Hailans Provins | 27 Oktoba |
| Galp Provins | 1 Desemba |
| (Sandaun) Wes Sepik Provins | 5 Desemba |

Ami bilong PNG i gat tupela nupela Jas nau long harim kot bilong ol soldia.

Mista Jastis Andrew em i nambawan Jas na Mista Jastis Kapi em i namba tu bilong em.

NEW Nem bilong mi
KILOMETRICO*
 Mi no inap pinis kwik.
 Mi stap longtaim, longtaim.
Traim!



Yu ken baim blu, o ret, o blak.

KILOMETRICO*
 by PAPER & MATE

Saut Pasifik Ats Festival

Planti pipel i stap long ol bipela taun bilong PNG i ken lukim ol kain kain pilai bilong pasin tumbuna, bai kamap long Julai long dispela yia.

Dispela ol pasin tumbuna pilai, bai ol pipel bilong ol kantri insait long Pasifik i putim kamap. Ol pipel ya bai kam long PNG long stap insait long bikpela so ol i kolim, "Saut Pasifik Ats Festival."

Long dispela bikpela so, ol pipel bilong arapela kantri bai soim yumi pasin tumbuna bilong ol. Ol bai putim kamap ol pilai ya long Maun Hagen, Goroka, Wewak, Madang, Lae, Popondeta, Rabaul na Mosbi.

Ol liklik grup insait long ol bikpela taun ya bai putim kamap sampela pilai tu. Ol bai soim pasin tumbuna bilong yumi long ol pipel bilong ol arapela Pasifik Kantri ya.

Nau bai i namba tri taim we ol kantri bilong Pasifik i bung wantaim long kamapim long dispela bikpela so. Namba wan taim i bin kamap long Fiji long 1972. Na

namba tu taim i bin kamap long Niu Silan long yia 1976.

As tingting bilong ol dispela kain so, em i bilong mekim ol pipel bilong Pasifik kantri i holimpas ol pasin tumbuna bilong ol. Ol dispela so tu, bai i mekim ol pipel i amamas long ol pasin tumbuna bilong ol na bai ol i no ken lusim tingting long en.

Dispela yia, so bai kamap long PNG na bai i stap inap tupela wik olgeta. Em bai stat long Jun 30 na i go pinis long Julai 12. Ol man i bosim so i ting olsem, ating bai i gat 2000 pepel i kam long PNG long stap insait long dispela so. Bai gat ol pipel bilong Fiji, Australia, Tahiti,

Niu Silan, Samoa na Solomon Ailan.

Ol kantri olsem PNG, Solomon Ailan, Fiji, Tahiti, na Samoa bai gat bikpela namba moa long ol arapela kantri insait long dispela so.

Bai ol mekim long ol maket, na ol ples bilong pilai spot, na long ol komyuniti na ol hai skul, na long ol kolis na ol Yunivesiti. Yu ken go lukim planti bilong ol dispela pilai fri. Na ol konset i kamap insait long ol bikpela haus tasol, em yu mas putim liklik mani long go lukim.

Ol man bilon lukautim dispela so i stat pinis long mekim redi ol ples we ol pilai bai



Poto i soim ol man i wokim pilai "Eberia". Ol Nesanel Ats Skul bai wokim dispela pilai long Saut Pasifik Ats Festival.

Poto: Paul Wagum (Bougenvil Kopa kampani)

kamap long en. Insait long Mosbi yet, ol wokman bilong siti kaunsil i stat pinis long planim gutpela gras long ol ples ol i makim long putim kamap pilai.

Wanpela bikpela

gutpela pilai tru, bai kamap taim ol kanu i sel long Samarai na i kam kamap long Mosbi. Ol dispela kanu, bipo ol pipel i save yusim long sel i go pait wantaim ol arapela pipel. Tasol nau bai no gat pait, ol

bai sel tasol. Ol kanu ya bai i kam long Manus, Siassi, Nu Ailan, na Milne Be.

Olgeta bai bung wantaim long Samarai na sel i kam long Mosbi. Ol bai stop long ol hap rot we ol sampe-

la kanu, ol pipel bilong Motu i save yusim long resis, bai joinim ol.

Olgeta bai kamap wantaim long Ela Bis long Mosbi long namba 30 de bilong mun Jun.

Planti pipel bilong ol arapela kantri i laikim tumas ol piksa ol atis — ol save-man bilong dro — i wokim insait long Papua Niugini.

Na long Jemani, wanpela kantri bilong Yurop, ol i wokim wanpela bikpela so long ol piksa i kam long ol atis bilong PNG.

Long Taun Stuttgart, klostu long 4,000 pipel i lukim ol piksa. Na nau, long dispela yia, bai dispela so i go long sampela arapela bikpela taun insait long Jemani — olsem Bonn, Bremen na Munich.

Na ol i kolim dispela so, "Tingting bilong Mi."

Ol i askim tupela atis, Joe Nalo bilong Manus na Jakupa bilong Bena Bena long Isten Hailans Provins, long kamap long dispela so. Na ol i askim tupela long droim sampela samting, taim ol i stap long so. Olsem ol inap lukim wok bilong tupela.



Gavman Givim Presen long Wewak

● Ben Kasanda

Sapos ol pipel long taun i laikim sampela helpim long Nesanel Gavman orait ol yet i mas kirapim bisnis o liklik projek bilong ol pastaim. Dispela toktok Praim Minista Mista Michael Somare, i mekim taim em i givim K36,000 long mekim ol sampela wok insait long Wewak Taun.

Em i givim dispela mani long sampela grup i laik kirapim ol kain kain wok insait long Wewak. Dispela presen i kam aninit long wanpela progrem bilong Nesanel Gavman ol i kolim Uban Erias Ektiviti Skim. Dispela progrem em i bilong helpim ol pipel i stap long taun husat i no gat wok na ol i save wokim pasin raskal long ol taun.

Long las yia Gavman i putim arere samting olsem K750,000 long dispela progrem.

Mista Somare i toktok Wewak i wanpela long ol taun em i bagarap long kain pasin nogut. Pasin bilong brukim haus na stil

na narapela kain trabel i wok long kamap bikpela long Wewak Taun.

Ol pipel bilong Mosbi na Lae Siti i kisim pinis sampela helpim aninit long dispela progrem. Taun bilong Wewak bai kisim K50,000 long dispela progrem. Ol i dilim K36,000 i go pinis tasol K14,000 i stap yet Mista Somare i givim aut ol samting olsem autbot mota, paint, ol samting bilong pilai spot, tang wara, banis waia na sampela mani long givim dispela 7-pela grup.

John Kiapin i kisim ol sampela samting i kostim K9,400. Em i laik kirapim bisnis bilong wokim bot long go painim pis.

Graham Campbell i kisim ol sampela samting i kos K7,000. Em i laik stretim Skaut hall long Wewak em ol raskal i bagarapim pinis.

Tobias Manaki i kisim sampela ol samting i kos K2,700 long droim kainkain piksa bilong ol tumbuna.

Kreer Komyuniti i kisim sampela samting tu bilong kamapim gutpela sidaun long Komyuniti bilong ol.

Wewak Yut Senta i kisim K2,000.

Philip Ande i kisim K11,000 long kirapim wanpela wok-sop bilong prinim ol poto long Nuigo.

Breder Wasa bilong Boys Taun long Wewak i kisim K5,000.

MOA

LONG MONI BILONG YU

Nupela!



TRAKA I WOKIM GUT OLGETA SAMTING

Wantaim 1166cc ensin,
Traka i gut tru long draivim
na em i gat strong long go antap
long ol maunten na long rot i nogat kolta.
Yu inap foldim ol sit sapos yu laik karim
kago long baksait.
Gutpela Toyota mechanical parts i givim gutpela wok.
Tasol bai yu mas kisim spares tu
sapos yu laikim.
TRAKA i wok tupela wei na i gutpela transport
bilong ologeta wantaim prais ino dia tumas.
Go lukim ol - Draivim ol nau long ELA MOTORS.



ELA MOTORS

A Member of Burns Philp Group



TOYOTA TRAKA

GS305

YU ASK LONG EN. YU KEN KISIM TOYOTA

Klab bilong ol Spakman

Olsem wanem, yu wanpela man bilong dring planti? Yu gat wanem kain wari i wok long bagarapim sindaun bilong yu long tude? Sindaun bilong yu i gutpela? Yu laik 60 i go long matmat? Sapos yu laik mekim olsem, bilong wanem tru?

Em sampela Kwesten wanpela lain long PNG i askim ol man meri long tingting gut long en.

Dispela lain ol i kolim long Alcoholic Anonymous o sotpela nem em i A.A. Dispela grup ol i kirapim long PNG long 17 yia i go pinis long helpim ol man na meri i save dring planti na i no inap lusim dring long olgeta de. Dispela lain i laik helpim ol man na meri i save dring planti long traim pinisim dring olgeta na wokim sidaun bilong ol i kamap gutpela.

Ol man i bosim dispela Felosip em wanpela Pater na wanpela Brata. Nem bilong Pater em i Mr. A na bilong Brata em i Mr. B. Ol i no laik givim nem tru bilong ol long wanem em i wanpela lo bilong ol. Olsem ol memba insait long dispela Felosip i no inap givim aut nem bilong ol. Nogut ol narapela pipel i ting dispela lain i man bilong dring tru na bai ol i karim sem.

Yu ken joinim dispela lain sapos yu ting yu laik senisim laip bilong yu. Yu ken join nating, nogat pe bilong kamap memba.

Mr. A i tok as tru bilong em i kirapim A.A. em i bilong helpim ol man i save dring olgeta de bai i no ken dring moa. Bai ol i sindaun gut gen olsem bipo taim ol i no save dring.

Insait long Pot Mosbi dispela felosip i gat 10-pela man i save dring planti i join pinis. Ol i save holim kibung bilong ol long olgeta Mande apinun.

Sampela bilong ol dispela memba i tok olsem laip bilong ol i

wok long senis. Sampela bilong ol dispela memba i tok olsem taim ol i joinim dispela Felosip, laip bilong ol i wok long senis senis isi isi. Sampela bilong ol i pasim dring olgeta. Ol memba i tok bia i wok long bosim laip bilong ol. Ol i dring bia olgeta de. Ol i no lusim bia long wanpela de tru.

Dispela Felosip i gat 12-pela lo ol man i laik pinis tru long bia i ken bihainim. Em hia sampela lo bilong ol:


Mipela pasim tok olsem bai yumi givim laip bilong yumi na ol wanem samting yumi mekim long olgeta de i go long han bilong God.

Mipela i bilip olsem i gat wanpela strongpela pawa i stap em inap long helpim yumi kamap gutpela man.

Yumi bai helpim gen ol pipel olsem Famili bilong yumi bagarapim taim yumi bihainim dispela rabis pasin bilong dring ol-taim.

A.A. Felosip bilong Mosbi i kirapim tu wanpela Senta long Sogeri. Dispela Senta bai lukautim ol man i no laik dring moa long stap autsait long siti na lusim tingting olgeta long bia. Nogut A.A i stretim laip bilong ol pinis na ol i go bek long haus bilong ol long Siti na sut i go gen long hotel. Olsem na dispela Senta bai pasim ol man i kamap orait pinis long stap olsem 3-4 mun bai ol lusim tingting long go long hotel.

Telephone: 255249.



MORTEIN SURFACE SPRAY I KEN KILIM NA RAUSIM OL BINATANG

Laip Long PNG



Na 4-pela manki i redi long mumu, ol i holim kumu na kon na anien na bikpela kaukau tru. Ples kol olsem Hailans i gat planti kain kaikai ol nambis i no save groim ol lukim Tasol ol Hailans tu i no save lukim kokonas o saksak o taro o pis.

Ol meri long kain kain ples i laikim kainkain bilas bai ol i kamap smat. Mama ya em i bilong Sepik antap. Long hap bilong em ol meri i gat pasin bilong hangamapim planti ring olsem long yau bilong em. Ol dispela ring ol i save wokim long skin trausel. Ol i save katim skin na bihain ol i hatim o putim long hatpela wara. Skin nau i malumalu na ol i wokim ring long ol . . . Baihain mama i go lapun pinis, em bai givim long pikinini meri bilong em. I olsem samting bilong tumbuna na samting i stap olgeta long famili.



Redi long Komyuniti Gavman

Wanpela kibung bai kamap long Timbunke long mun Mas long painim we na tingting long kirapim Komyuniti Gavman long Is Sepik Provins.

Ol memba bilong Provinsal Gavman, Lokal Gavman Kaunsil na ol bikman long ol ples bai bung long dispela kibung. Ol i laik toktok long painim tingting na we bilong kirapim Komyuniti Gavman long ples.

Wanpela Opisa bilong Is Sepik Provinsal Gavman, Mista Patrik Hokmori i tok Is Sepik i laik kirapim Komyuniti Gavman bikos ol i painim olsem liklik Gavman long ol ples bai isi long bungim ol pipel na kirapim developmen

long ples.

Em i tok Lokal Gavman kaunsil i bikpela tru na i no inap lukautim na bringim wok go het long olgeta ples insait long Provins. Komyuniti Gavman bai gutpela long wanem ol bikpela na liklik ples i ken bung wantaim long kirapim Komyuniti Gavman na lukautim gut ples bilong ol yet.

Nau long dispela taim tupela provins tasol long PNG i gat komyuniti gavman em long Not Solomons na Is Niu Briten Provins.


Timbunke em as ples bilong Primia bilong Is Sepik Pater Cherubin Dambui.

● Ben Kasanda



Debessa Sekyuriti, em i wanpela bisnis bilong mekim ol kain kain wok bilong lukautim yu na haus bilong yu na ol arapela samting bilong yu.


Mi wanpela wokman bilong Debessa Sekyuriti. Mi kam nau long tokim yu long ol kain kain wok mi na ol wanwok bilong mi i save mekim . . .



Sapos olsem, ol man i stil o ol man i brukim haus, mipela i save mekim wok painimaut long painim husat tru i bin mekim dispela rong. Tasol as tingting bilong wok bilong mipela, em i bilong traim na stopim ol trabel bai no ken kamap.



Sampela taim mipela i save lukautim ol bikman taim ol i raun long ol pablik ples.



Em hia, yu ken lukim sampela poto i soim ol wanwok bilong mi i wok. Ol i wok long raun lukautim ol haus bilong ol man. Mipela ol wokman bilong Debessa Sekyuriti, i save wok de na nait long lukautim ol haus.



Mipela i gat sekuriti ka na ol plisman bilong lukautim na karim mani o ol gutpela samting bilong yu i kam i go. . . .



Yu laik save moa, yu ringim bos bilong mi tasol. Namba 25 3093. O yu ken rait long P.O. Box 6357 Boroko, PNG.



Westen Hailans Simbu Na Enga Provins Pait Olgeta Taim.

Dia Edita — Plis larim liklik spes bilong mi long putim liklik wari bilong mi long en. Wari bilong mi i go olsem.

Plis ol wantok bilong Hailans, yupela mas harim gut dispela kwesten bilong mi. Na kwesten o askim bilong mi i go olsem.

Wanem as na wa-

nem risen tru yupela i save bagarapim gutpela sindaun bilong dispela gutpela yangpela kristen kantri bilong yumi?

Yupela i save kirap na kilim ol wanpisin na tu ol arapela poroman bilong yumi bilong arapela ol provins. Dispela pasin i no stret.

Sapos wanpisin

bilong yumi o ol man bilong arapela provins mekim wanem kain pasin nogut long yu, yu mas i go long plis stesin na ripot long ol. Na bai plis i karim ol i go long kot na bai ol i go long kalabus. Em bai ol i kisim hat lepa na bai ol i ken pilim nogut pastaim.

Tasol yumi save mekim dispela kain

pasin nogut na yumi save bagarapim olgeta provins long hailans. Na tu yumi save mekim na bagarapim nem bilong ol taun long ol hailans provins.

Ol ovasis turis ol i kam bilong lukluk raun long ples na taun bilong yumi. Tasol ol i save harim olsem i gat pait long hailans, nau na ol i save

tanim i go bek long Pot Mosbi, Lae o Rabaul. Bihain ol i save go bek long kantri bilong ol gen.

Yupela mas yusim het bilong yupela.

Em tasol long liklik wari bilong mi.

K.A. Hamona, Lorengau, Manus Provins.

Larim Lae Ples Balus I Stap.

Dia Edita — Yu inap givim mi liklik spes na bai mi rait na bekim pas bilong wantok ya, Kloie Kumbu. Bekim bilong mi i go olsem.

Long Desemba 6 las yia, mi baim Wantok Nius na mi lukim brata ya tok long rausim Lae ples balus. Na yu tok long husat man i laik orait i ken egensim yu. Orait nau yu baim Wantok Nius na bai yu lukim mi tok egensim yu.

Yes brata Kloie. Yu tok long ples balus long go antap long Nadzab. Em i no gutpela tumas. Sapos yu laikim olsem, orait yu mas toktok wantaim ol pipel bilong Morobe Provins pastaim.

Nau yu lukim, sapos sampela ples bilong Morobe i stap insait long bus na i no gat rot, mipela i save ran long balus. Na tu yu lukim, sapos wanpela man o meri o pikinini i sik nogut tru na i laik dai, Nadzab i longwe tumas. Sapos ples balus i stap klostu long hausik, em i gutpela.

Na tu yu husat man meri bilong arapela provins, yu kam stap long Lae siti, yu ting olsem yu gat inap na yu kam? Top-taun i go long maket, em i no longwe. Yu ken wokabaut i go. Sampela pipel i gat mani i ken kisim bas o PMV long taun na go daun long maket. Na brata Kloie, yu ken wokabaut, sapos yu ting yu no gat mani long poket bilong yu. Dispela olgeta kona yu tok long en, em i no long we long wokabaut.

Harim brata. Sapos yu laik putim skin long Lae, orait yu go bek long provins bilong yu yet. Yu no ken stap long provins bilong mi.

Sapos yu ting olsem wanem, orait, rait tasol long Wantok

Nius na mi ken lukim. Tenkyu.

Johnsty Amba Thinza Lae, Morobe Provins.

Bisnis Man Mekim Ol Pasin Nogut.

Dia Edita — Yu inap givim mi liklik spes na bai mi autim wari bilong mi i go long ol wantok bilong mi. Wari bilong mi i go olsem.

Ating planti bisnis man bilong PNG i narakain long dispela bisnis man bilong Wau. Dispela man i save bagarapim ol arapela man nating. Em i save kotim ol susa na tambu meri bilong em sapos ol i no harim tok bilong em.

Na tu em i save posinim ol meri long no ken karim pikinini i go inap taim ol i lapun meri. Em i no gutpela tumas. Dispela man i save mekim karanki pasin tru. Dispela man i save mekim karanki pasin tru. Dispela kain pasin i no inap kamapim kantri bilong yumi.

Olsem na mi save pinis olsem planti ol meri i no save karim pikinini i save sik ol-taim. Na dispela kain posin tu i save paulim tingting bilong ol man meri na ol i save mekim pasin nogut.

Dispela bisnis man bai tu i save spenim planti mani long pasin pamuk na ol planti kain rabis pasin. Mi yet mi save bel hevi long kain posin i save kamap long bisnisan olsem. Klostu ol sampela meri i dai long dispela posin bilong em. Dispela bisnisan tu i bin posinim namba wan meri bilong em i dai. Em i kirap na maritim wanpela meri gen.

Pasin bilong em i nogut. Em i save slip wantaim ol meri nambaut na em i no save tingting long bisnis bilong em. Planti man na meri i save pret long kain pasin bilong em. Em i save mekim kain giaman ripot olsem ol man na meri i save mekim pasin nogut. Tasol em i save giaman, na kotim ol pipel nating tasol.


Sapos husat man o meri i ting dispela kain bilong bisnis man ya gutpela orait em i ken bekim pas bilong mi. O sapos yu sapotim mi orait mi tenkyu tru long yu.

Pisom Moyo Wau Morobe Provins.


LONG

k3790 TASOL!

BAI YU amamas tru long kisim wanpela



mitsubishi YUTILITI



bilong 1980



Yu laikim wanem ol kain samting bilong wanpela gutpela Yutiliti? Yu laikim em long i gat pawa bilong go antap long maunten o ran long rot nogat kolta..... Yu laik em i mas i gat bikpela spes long baksait na insait..... Yu laik ples bilong draiva i mas gutpela na ka i mas isi long staim..... Yu laik em i mas i gat bikpela teng bilong bensin..... Yu laik em i mas i gat pawa bilong strongim brek..... MITSUBISHI YUTILITI em i gat olgeta dispela samting. Dispela strongpela Yutiliti bai helpim yu gut tru. Mani bilong yu i no nap lus nating.

Em inap mekim ol kain kain wok bilong yu inap longpela taim moa. I gat kain kain Mitsubishi Yutiliti. Wanem kain Yutiliti yu laikim, i stap... Prais bilong ol i no bikpela. Olsem na yu mas hariap nau long baim wanpela.

Yu ken go nau na traim draivim wanpela MITSUBISHI YUTILITI long.....

TOBA PTY. LTD.

| | | | |
|------------------------------------|----------------------------|--------------------------------|-----------------------|
| TOBA PTY. LTD. PORT MORESBY | TOBA PTY. LTD. LAE | KAMSCO KAVIENG | RABAU GARAGE RABAU |
| HAGEN HAULIERS MT HAGEN | LINUPA PTY. LTD. GOROKA | MICHAEL WING YOU MANUS | |
| GIRIDA UNDARI MOTORS POPONDETTA | WONG KUI BUKA | STEAMSHIPS MACHINERY MADANG | |



MITSUBISHI

HEB138



God I Mekim Save Long King

2 Samyuel 12:1-14

TRU, A? WANEM RONG I KAMAP? TOKIM MI HARIAP.

LONG WANPELA TAUN TUPELA MAN I STAP.

WANPELA I GAT PLANTI SAMTING NA NARAPELA I RABIS TRU. I LA MANIMAN I GAT PLANTI SIPSIP, NA 'SMAN I GAT WANPELA TASOL I STAP NA SAVE LAIKIM TUMAS.



BIHAIN WANPELA MAN I KAM I STAP LIKLIK WANTAIM MANIMAN. NA MANIMAN I KISIM PIKININI SIPSIP BILONG RABISMAN NA KILIM BILONG MEKIM BIKPELA KAIKAI.



NETAN I STORI I GO NA BEL BILONG DEVIT I HAT LONG PASIN BILONG DISPELA MAN.

MAN I MEKIM OLSEM I MAS I DAI.



KING HARIM. DISPELA MAN EM YU TASOL. GOD I BIN MEKIM YU I KAMAP STRONGPELA NA I GIVIM YU PLANTI SAMTING. TASOL YU BIN LAIKIM BATSIBA, MERI BILONG WANPELA GUTPELA SOLDIA BILONG YU. NA YU BIN KILIM EM BAI YU KEN MARITIM MERI BILONG EN.

TRU TUMAS, MI BIN MEKIM SIN LONG BIKPELA. ASUA BILONG MI YET.



Used by permission of the David C. Cook Foundation. Copyright 1973. David C. Cook Publishing Co. All rights reserved.

Komik hia i kamap pinis long buk. Yu inap baim long olgeta Kristen Buk Stua.

Roseri Sista Hetmama

Hetmama bilong ol Roseri Sista bilong Wewak em Sista Teresia Alan.

Sistea Teresia i bin stap long namba wan lain Sepik meri tru i bin kamap long Wewak long yia 1950 long statim ol Roseri Sista. Sista Teresia Alan i gat 44 krismas.

Mama i bin karim em long yia 1935 long Timbunke Viles long Sepik antap. Papa bilong em i stap long lain bilong ol 99 man na wanpela meri, em ol Japan i bin kilim long wanpela de tasol, namel long Timbunke Viles long taim bilong woa. Inap nau ol pipel i no save tru we stap ol bun bilong ol dispela wantok.

Taim Sista Teresia i liklik meri, em i go skul long ples inap long standet 4. Tisa bilong em i wanpela katekis bilong bipo, em i gat biknem tru. Nem bilong em Andreas Augui.

Orait, nau Sista Teresia wantaim wanpela arapela Timbunke meri, Sista Maria Goretti, tupela i kamap long Wewak i laik joinim nupela samting: em ol Roseri Sista. Em i long yia 1950.

Bihain em i kamap Sista tru na i mekim promis bilong em long 1953, orait, Sista Teresia i go long Mosbi na i laik tren olsem nes long Sen Teresa hausik long Badili. Hia em i wok hat tumas na em yet i kisim sik Tibi long ol sikmanmeri yet. Orait, em i kam bek long Wewak na i winim sik Tibi. Bihain em i go bek long skul na pinisim gret 7.

Long 1962 em i go long Kunjingini na i wok olsem praimer skul tisa. Em i bin tis tu long Wirui na i kamap het tisa long Yarapos Praimer skul. Insait long ol dispela taim em i bin mekim korespondens kos i go inap long gret 10.

Orait, long yia 1973 em i go long bikpela tis trening koles long Hagen, na i kisim setifiket bilong hetmasta. Nau em i go long Sikiro, long Enga Provins, na em i ranim komyuniti skul hia inap long 7-pela yia stret.



Sista Teresia.

Sande Lotu

Frank Mihalic

2 Mas 1980 -

SANDE 2 BILONG LEN

Luk 9: 28 - 36

Long dispela stori, Jisas i go antap long wanpela maunten wantaim tripela disapel bilong em. Hia em i kamap narakain, na hia i olsem tripela i lukluk insait long heaven long hap ai tasol. Man, tripela i amamas tru. Tripela i laik stap olgeta antap long dispela maunten. Tasol nogat. Jisas i tokim tripela long ol i mas go daun bek na karim pen na hevi. Tasol ol i no ken lusim tingting long dispela gutpela ples nau tasol ol i bin lukim. Dispela tingting i mas strongim bel bilong ol.

Yumi save pilai soka gut, sapos yumi lukim gol. Sip na balus i mas stia i go long wanpela ples. Em i gol bilong tupela. Yumi save wokabaut longpela rot bilong kamap long wanpela ples. Em i gol bilong yumi. Gol i pulim yumi. Yum lukim gol, yumi hangre long kamap long go. . . na olsem yumi no pilim pen na wari na taim nogut.

Long spirit bilong yumi i wankain. Yumi stap long hap rot i go long heaven. Heaven em i gol. Olsem na em i gutpela sapos yumi tingting liklik long dispela heaven. Em i wanem kain samting?

Sen Pol i piksaim heaven olsem: "Ai i no lukim yet na ia i no harim yet olgeta gutpela samting God i bin redim long ol manmeri i laikim em." (1 Kor. 2,9)

God i bin putim ol kain hangre insait long yumi. Na em i pasin bilong God, em i no save mekim o wokim samting nating. Nogat. Sapos God i wokim ai, yu ken save i mas gat samting bilong lukim. Sapos em i wokim ia, yu save pinis i mas gat samting bilong harim. Sapos em i wokim bel, orait, i mas gat samting tu bilong putim insait long dispela bel. I sapos wanpela man i wokim kanu. Ating i

mas gat wara klostu.

God i bin putim wanpela hangre insait long spirit bilong yumi tu: Hangre bilong kisim olgeta gutpela samting. . . gutpela taim, na gutpela ples, na gutpela kaikai, na gutpela pren, na gutpela amamas. Yumi save ting long heaven i wanpela kain taim na ples we ol dispela hangre bilong yumi bai pinis.

Na long heaven, olgeta samting yumi no laikim, em bai pinis olgeta. Bai no gat moa sik na pen na trabel na wari na birua na hangre na wok na kain kain samting nogut. Olgeta samting yumi laikim, em bai stap. Na olgeta samting yumi no laikim, em bai stap longwe. . .

Na long heaven ol dispela samting bai stap inap oltaim oltaim. Bai no gat pinis o arere bilong ol. Bai no gat taim moa. Maski hanwas. Maski klok. Maski em i wanem de o mun o yia. . . Ol dispela samting bai pinis nau. Pinisim olgeta laik em i aslo bilong heaven.

Nogut yumi wok wok tasol na yumi no lukluk long heaven sampela taim. Nogut yumi olsem man i lukim handel stia, tasol em i no lukim rot. Yumi olsem man i lukim gol. Yumi no mas wokabaut olsem snek i pulim pes long graun tasol. Nogat. Yumi mas wokabaut olsem pisin i go antap. . . .

God i olsem wanpela magnet i pulim yumi i go long em yet. Bihain yumi kamap long God, orait, yumi anka pinis. Nau yumi sindaun olgeta i stap. Man i kamap long heaven pinis, em i olsem hap ain i pas pinis wantaim magnet i bin pulim em. Magnet i no pulim em moa. Tupela i pas pinis olgeta. Magnet i pinisim wok bilong em pinis.

Sabaou i stilim bet abus bilong Rako



☆ **RAUSIM TOKMAN** – Rasia i rausim pinis Tokman bilong Niu Silan long Rasia. Rasia i tokim Mista Jim Weir long klia long Rasia long dispela wik yet.

Rasia i mekim olsem bihain tasol long Niu Silan i rausim tokman bilong ol long Niu Silan. Niu Silan gavman i rausim tokman bilong Rasia long wanem em wok long givim helpim wantaim mani i go long Komyunis pati long Niu Silan.

☆ **IRAN ILEKSEN** – Long kantri Iran ol pipel i vot nau long painim Presiden bilong ranim kantri. Dispela em i namba wan taim tru long dispela kantri i mekim Ilekseen.

I luk olsem Fainens Minista, Abolhassan Bani-Sadr bai kamap namba wan Presiden bilong Iran.

Lo bilong ol i olsem, bihain long ol pipel i vot long em i sanap olsem Presiden orait long narapela mun bai ol pipel i vot gen long painim wanem man bai kamap Presiden long Palamen bilong ol.

Long dispela taim 7-pela man i sanap long Ilekseen, long traim kamap Presiden.

Nau wanpela kaunsil i bosim kantri i stap. Ayatollah Khomeini em na go pas long bosim kantri long dispela Kaunsil.

☆ **RASIA I MAS RAUS** Long las wik ol Foren Minista bilong 36 kantri husat i stap aninit long lotu ol i kolim Islam i bung na tok olsem Rasia i mas rausim soldia bilong ol long Afganistan. Ol i pasim tok tu olsem ol bai i no inap luksave long Gavman bilong Afganistan em Rasia i putim kamap long pawa bilong ol yet..

Ol i pasim tok long katim olgeta pasin bilong kamap gutpren wantaim Gavman bilong Rasia na Afganistan.

Ol i tok olsem sapos Rasia i mekim wanem kain nogut pasin long Pakistan o Iran bambai ol i helpim tupela kantri hia long sanap strong na kik bek. Ol Islam kantri i singautim ol arapela kantri long graun long helpim ol pipel bilong Afganistan long ranim kantri bilong ol yet na maski long helpim bilong bikpela as gras olsem Rasia.

Bipo tru i bin i gat tupela man i stap long dispela tupela ples, Paup na Yakumul. Nem bilong tupela i Sabaou na Rako. Sabaou i stap long Paup na Rako i stap long Yakumul. Sabaou i no bin save olsem Rako i stap long Yakumul. Wanpela taim em i stap long wanpela maunten na em i kolim nem bilong em yet. Na long arapela sait tu Rako i sanap long maunten long hap bilong em yet na i kolim nem bilong em yet.

Rako, em i man bilong kilim abus. Long hap bilong Rako i gat moa abus olsem, pik, muruk, sikau na ol kainkain pisin. Rako i marit man tasol em i nogat pikinini. Sabaou, tarangu, i nogat abus long hap

bilong en. Em i save kai-kai sayor (greens) na binatang bilong saksak tasol.

Wanpela taim long apinun nogat klaut long maunten, Sabaou i sanap antap long maunten bilong em na lukim smuk i kamap long maunten bilong Rako. Na em i ting, ating i mas i gat wanpela man i stap long dispela maunten.

Em nau long wanpela taim em i tingting long go lukim husat man tru i stap long dispela hap. Em i wokabout i go na painim Rako long Yakumul. Em i lukim insait long haus bilong Rako i

bagarap tru long abus tru. Na Rako i givim sampela long em na em i karim i go long haus bilong em long Paup. Taim Sabaou i laik go bek em i tokim Rako, pren ating wanpela taim bai mi kam lukim yu gen. Em i no givim taim long Rako.

Wanpela taim gen Sabaou i kam long Yakumul long lukim Rako, tasol em i no bin stap long haus. Em i bin go long bus long painim abus. Meri bilong em tasol i stap long haus. Sabaou i karim sampela sayor na binatang bilong saksak kam givim meri bilong Rako.

Ol i stap na Sabaou i tokim meri bilong Rako olsem nek bilong em i drai, na em i laik dring wara. Meri bilong Rako i tokim em olsem nogat wara long haus. Nau man i tokim em, yu go kisim. Meri i go na em i pispis long baket na i kisim i kam long Sabaou. Tasol man ya i lukim na em i tokim meri ya, em i no wara. Em yu pispis long baket. Tarangu meri i go bek gen long kisim wara tru. Wara tru i stap longwe tru, olsem wan mail. Taim meri i go long kisim wara, Sabaou i kirap katim bed abus ya na karim ranawe i go long Paup.

Taim Rako tupela meri bilong em i kam bek long haus, ol i nogat tok. Tupela i kaikai sayor na binatang bilong saksak tasol. Na Sabaou ya i go long Paup na i stap kaikai abus tasol. Olsem na, nau mipela ol Paup i gat moa abus long bus bilong mipela na ol Yakumul i save kaikai sayor na binatang tasol.

Sapos yu go long Aitape long Wes Sepik Provins na yu kamap long Paup, yu ken lukim tupela maunten ya, Sabaou na Rako i stap.

Paul Cosmas Aitong, Aitape, Wes Sepik


| | | | | | | | | | |
|---|---|---|---|---|---|---|---|---|---|
| <p>MOISTURE RESISTANT TROPICAL MATCHES AVERAGE CONTENTS 45</p> <p>self reliance</p> | <p>MOISTURE RESISTANT TROPICAL MATCHES AVERAGE CONTENTS 45</p> <p>self reliance</p> | <p>MOISTURE RESISTANT TROPICAL MATCHES AVERAGE CONTENTS 45</p> <p>self reliance</p> | <p>MOISTURE RESISTANT TROPICAL MATCHES AVERAGE CONTENTS 45</p> <p>self reliance</p> | <p>MOISTURE RESISTANT TROPICAL MATCHES AVERAGE CONTENTS 45</p> <p>self reliance</p> | <p>MOISTURE RESISTANT TROPICAL MATCHES AVERAGE CONTENTS 45</p> <p>self reliance</p> | <p>MOISTURE RESISTANT TROPICAL MATCHES AVERAGE CONTENTS 45</p> <p>self reliance</p> | <p>MOISTURE RESISTANT TROPICAL MATCHES AVERAGE CONTENTS 45</p> <p>self reliance</p> | <p>MOISTURE RESISTANT TROPICAL MATCHES AVERAGE CONTENTS 45</p> <p>self reliance</p> | <p>MOISTURE RESISTANT TROPICAL MATCHES AVERAGE CONTENTS 45</p> <p>self reliance</p> |
| <p>MOISTURE RESISTANT TROPICAL MATCHES AVERAGE CONTENTS 45</p> <p>self reliance</p> | <p>MOISTURE RESISTANT TROPICAL MATCHES AVERAGE CONTENTS 45</p> <p>self reliance</p> | <p>MOISTURE RESISTANT TROPICAL MATCHES AVERAGE CONTENTS 45</p> <p>self reliance</p> | <p>MOISTURE RESISTANT TROPICAL MATCHES AVERAGE CONTENTS 45</p> <p>self reliance</p> | <p>MOISTURE RESISTANT TROPICAL MATCHES AVERAGE CONTENTS 45</p> <p>self reliance</p> | <p>MOISTURE RESISTANT TROPICAL MATCHES AVERAGE CONTENTS 45</p> <p>self reliance</p> | <p>MOISTURE RESISTANT TROPICAL MATCHES AVERAGE CONTENTS 45</p> <p>self reliance</p> | <p>MOISTURE RESISTANT TROPICAL MATCHES AVERAGE CONTENTS 45</p> <p>self reliance</p> | <p>MOISTURE RESISTANT TROPICAL MATCHES AVERAGE CONTENTS 45</p> <p>self reliance</p> | <p>MOISTURE RESISTANT TROPICAL MATCHES AVERAGE CONTENTS 45</p> <p>self reliance</p> |

Traim nau nupela Tropical Masis em i nambawan

Traim Tropical Masis nau, em inap lait long taim bilong ren na kol.

Kisim olgeta bokis masis wantaim. Olgeta bokis i gat dispela nem "Self reliance"





BIABIA



TOK SAVE

TOK SAVE i go long Manawi Karawusi bik brata bilong mi. Yu bin ranawe long ples na i go long long Lae long 1962. Bihain yu lusim Lae na i kam long Mosbi. Mi no lukim em inap 18 yia nau. Mi wari nogut tru long brata bilong mi olsem na mi kam long Mosbi long tra-im painim yu. Tasol mi no painim brata bilong mi yet. Olsem na mi laik putim tok save i go long husat man o meri i save long em. Sapos yu lukim em o yu save long wanem hap em i stap, plis salim tok i kam long dispela adres: Tom Karawusi, P.O. Box 7186, Boroko. N.C.D.

Salim tok save i kam long:

Tok Save,
Box 1982,
BOROKO.

Pe Bilong Kakao – Kopra

KAKAO – K1,733 long wan wan tan.

KOPRA – Hot Air (Grin) – K266 long wan tan.
F.M.S. (Blak) – K263 long wan tan.
Smok (Red) – K261 long wan tan.

LONG LIKLIK BRIS:

Namatanai – K245
Buka – K244
Finschafen – K240
Samarai – K239

Stretim Tok

| | | | | |
|----|---|----|---|---|
| 1 | 2 | 3 | 4 | 5 |
| | 6 | | | |
| 7 | 8 | | | |
| 9 | | 10 | | |
| 11 | | | | |

W.H. Ludwig i raitim

Stret: 1. Bikpela taun long Saten Hailans Provins. 6. Ol smok balus i save mekim bikpela. 7. Namba. 9. Hap sankamap. 10. Ol resa na ol naip na sisis i olsem tasol. 11. Tromoim ol kaikai i kamaut long bel gen.

Daun: 1. Em liklik hap bilong wanpela aua. 2. Liklik toktok. 3. Wankain tasol olsem namba 6 stret. 4. I mas peim bek mani. 5. Pikinini bilong Jakob na brata bilong Josep. 8. Baksait bilong bodi bilong man.

Namba 63: Ansa Bilong Las Wik.

Stret: 1. Sid. 4. Op. 5. Oda. 8. Saket. 9. Tin. 11. Spana.

Daun: 1. Sisis. 2. Inap. 3. Dokta. 5. Pat. 7. De. 10. Na.



Joe Aova bilong Goldie, traim hat nau long abrusim ol lain bilong Taurama. Goldie i strong moa na Taurama i karim kiau.



Kas bilong Goldie. Man, wanpela pilaia bilong Goldie 60 i go long trai lain long putim trai. Ol Taurama i raunim em i go i kam. Goldie i win 21-13.

MASIN BILONG MEKIM YU FRI

Yu inap long baim wanpela ka?
NOGAT

Ating yu laikim transpot bilong yu wanpela tasol?
Go lukim HONDA Motabaik.

Yu ken baim wanpela HONDA long K594 tasol.

Na em i no save dringim planti bensin.

Nogut yu lusim mani nating.

Baim HONDA.

HONDA®



Steamships - MACHINERY

Port Moresby 25 9066
Rabaul 92 1400

**and HONDA
dealers**

Madang 82 2055
Goroka 72 1488
Lae 42 4799

HEBAMO 125

Mosbi Soka

Dro bilong pilai bilong 1980 sisen bai stat kamap long namba 12 de bilong mun Epril. Tasol olgeta klap i mas baim mani (rejistresen fi) bilong ol bipo long namba wan de bilong mun Mas. Ol klap i no inap pilai long dispela sisen i mas ring o tok save long man i lukautim wanem divisen klap bilong yu i stap long en. Olsem bai ol man i lukautim soka inap putim arapela tim i go insait senisim tim bilong yu.

| Primias | Resev | 1st Divisen | 2nd Divisen | 3rd Divisen | U19's Divisen |
|------------|------------|-------------|--------------|--------------|---------------|
| Yunivesiti | Yunivesiti | Air Niugini | Admiralty | Aij Yunaitet | G.F.C. |
| Tarangau | Tarangau | Amoana | Blu Kumal | Ballsalam | Guria |
| G.F.C. | G.F.C. | Capewood | Cape Vogel | Cape Nelson | Idubada |
| Guria | Guria | Elkom | Co-Op | Cigga | Maegin |
| Solo | Solo | Kapit | Difens | Goodenough | P.W.D. |
| Sunam | Sunam | Ke | Ilimo Fam | Haus Bilas | Sogerl |
| Maegin | Maegin | Kiriwina | Imele Ranjas | Kruff | Semineri |
| Semineri | Semineri | Kunta | Kula | Mannah | Solo |
| P.W.D. | P.W.D. | Manolos | Luteran Yuts | Paradise | Sunam |
| | | Tegelu | Paramana | Tokenen | Tarangau |
| | | | | | Yunivesiti |

Wimens Divisen

Long dispela divisen bai mipela stap wetim tasol wanem ol 10-pela tim i kam givim nem pas long mipela, em ol dispela tim bai pilai.

Notis

Long dispela sisen, bai yumi yusim I.D. kat gen long soim na pilai. Olsem na mipela i askim olgeta pilaia long givim tupela paspot poto wantaim eplikesen pepa i go long husat man i bosim klap o tim bilong yu. Ol fom bilong yu aplai long pilai long dispela sisen, em yu ken

TOK SAVE I GO LONG OL MAN I GAT LISENS

MEMBA



BILONG

1978

1979

WOL SKIN PUKPUK SO

Salim skin pukpuk long dispela mak tasol. Mak bilong yumi olsem, namba wan kampani bilong PNG i sanap long So Bilong Skin Pukpuk Long Wol long hap bilong Frans na Yurop, long 1978 na 1979. Tingim prais bilong yumi, em i winim tru prais bilong ol narapela kampani long PNG o ovasis. Em hia adres bilong yumi.

Central Pacific Import/Export Pty. Ltd.,
P.O. Box 6699,
BOROKO'

Phone: 211623 o 21.1635

Sapos Yu Laik Kamap Wanpela Mamba Tu.

kisim long Air Niugini Klap o ol komiti memba, o long Haus Bilas o long ples yumi save pilai long en, Bisini Pereid Graun.

Sapos yu laik save moa long ol toktok bilong Rejistresen bilong dispela yia, ringim man bilong lukautim mani, Jackson Zozingao long dispela namba, 273573.

Ragbi Lig

Insait long Mosbi, Ragbi Lig i laik op nau. Namba wan Ragbi pilai long 1980 bai stat long mun Febrieri long de 23 na 24.

Dispela pilai ol i kolim long pri-sisen kompetisen.

Mari Barek 1 Ragbi Sempion

Mari Bareks Namba 1 tim i winim pes prais long Difens Fos Ragbi Yunion pilai long Mosbi long Trinde Janueri 30. Ol i winim na wilwilim tru Mari Bareks Namba 2 tim karangi stret. Poin i sanap olsem 29-8.

Ol soldia bilong ap sempion long wan- Mari Bareks, Goldie, em ol i pilai bung na Taurama Bareks i wantaim na bal i no pilai long traim win- stap longpela taim im pes prais long 4-pe- long han bilong nara- la wik olgeta. Tupela pela tim.

Mari Bareks Nam- ba 1 tim i putim 6-pe- la trai. Na kikim tupe- la gol i go insait olsem na ol i kisim 29 poms.

Namba 2 tim bilong Mari Bareks i putim 2-pela trai tasol.

Long narapela pi- lai, Goldie i winim Taurama. Poin i san- ap olsem 23 -13. Goldie i win bikos ol i gutpela man olsem Joe Mova, Dick Larry na Robert Kua, i strong na pilai gut.

Ragbi Yunion i wanpela pilai olsem Ragbi Lig tasol Ragbi Yunion i gat 2-pela moa man i stap insait long tim.

Ragbi Lig i gat 13-pela man i pilai na Ragbi Yunion i gat 15 man i pilai.

I gat sampela we bilong pilai tu i no wankain long dispela tupela pilai.

Poto antap.
Wanpela soldia bilong Taurama katim stret namel bilong ol Mari Bareks 1. Taurama i no inap winim Mari Bareks.

Long lephan.
Martin Binatang, i planim stret wanpela plaia bilong Goldie i go insadait long graun. Mari Bareks 2 winim Goldie. Tasol las wik em i no inap long winim Mari Bareks.

Long raithan.
Yu husat? Rausim rabis han bilong yu. Joe Mova (raithan) bilong Goldie tim i autim stret ai bilong wanpela plaia bilong Mari Bareks 2. Ol i pilai long kamap sempion tim.



AIR NIUGINI

HELPIM KANTRI GOHET

THE NATIONAL AIRLINE OF PAPUA NEW GUINEA



Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.